



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : Tir Yimiyim tiryimiyim@aolima tir yimiyim TAPAK 8

Italian Open: Djokovic quarter-final-i iogo

Nepal nung sorkar tasen tentettsü tim atemer



VOL. XVIII NO. 209 (ADOK 209) DIMAPUR ROGONÜ (FRIDAY) MONUPII (MAY) 14, 2021 ₹ 5.00

CM-i Meriema nung lenmang yangluba tesem semdang



Dimapur, Monupii/May 13 (TYO): Nagaland Chief Minister, Neiphiu Rio-i March 13, 2021 nü Meriema, Kohima nung Kohima-bypass lenmang nung longpok (tunnel) yangluba semdanga liasü.

Iba mapang Chief Minister dang Executive Director, Regional Office, NHIDCL, Kohima, MS Doel aser General Manager, PMU, Jakhama, NHIDCL, SP Singh nati maparen indang osang tongmelang agi lemsatempa liasü. Ketzangsurtemi parnok dang mapa renloka aoba, technical osang aser timtem balala ajangshiba indang lemsatemp.

Kasa mapang Rio-i Meriema yimdak alirtem den sensakema iba project mapang shidak nung takok ngua tembangtetsü atema teyaritep aser amalitep alitsü ayongzüka liasü. Yimdaklir temia parnok i akokba lenmang nung

yariteptsü ashi.

Chief Minister ya meina Principal Secretary to Chief Minister, KD Vizo; Principal Secretary, Works and Housing, Menukhol John aser Deputy Commissioner, Kohima, Gregory Thejawelie nungertem densema sorkar ketdangsur aika oa liasü.

Iba longpok ya High Court Junction, Meriema anasa lir, koba meter 500 talang asütsü, lenden nung meter 11 aser metong nung meter 5.5 asütsü.

Iba longpok ya SARDP-NE on EPC Mode (Package II) kübok NH-39 (NewNH-02), NH-150 (NewNH-02), NH-61 (New NH-29) aser Design Km 10.500 nungi Design Km 21.00 (Design Length- 10.500 Km) tashi NH-39 (New NH-02) sendaktepba two-lane Kohima-bypass road nung shilem ka lir.

Angh Ravi-i Eid benjung salem lemsatemp

Dimapur, Monupii/May 13 (TYO): Nagaland Angh R.N. Ravi-i sangdong ka ajanga Nagaland nung aliba nüburtem den Eid benjung salem lemsatempogo.

Eid benjung ya ita tepeyong lumia aruba tembangba temaitsü sayuba benjung ka lir. Iba benjung ya alima ajunga nung Muslim nungertemi kanga metsüngareta amunger. Benjung ajanga ita tepeyong anüdok nungi anülü tashi lumiba tembangba temaitsü sayur. Eid amungba mapang

sarasadamba, teyari maparen balala inyakba, lokti adenshina benjungtepa, lokti aser kija kibongtem nung benjung ayonga chiyongtepa, semtep lemsatempba amala inyakyim tem bulua benshir, ta Angh-isa ashi.

Maneni Angh-i benjung amungba mapang COVID-19 inyakyim sülen tashi anga anidaktsü atema mepeshiba den benjung temoatsüma nung aser anema lia pelatempa amungtsü imlaja ataba lemsatemp.

Dimapur District nung garitem Odd-Even yimya nung jajatsü

Dimapur, Monupii/May 13 (TYO): Taoba mapang totuyuba agüja aliba metitemi, Dimapur District nung gari ajunga maneni ODD-EVEN yimya nung May 21, 2021 tashi jajatsü, ta Commissioner of Police, Dimapur,

Rothihu Tetso, IPS ajanga sangdong ka nung metetdaksü.

Taoba mapang totuyuba agütsüba nung shia aliba ama tanüngba totuyuba ajak kasa alitsü, ta sangdong ajangasa ashi.

K. Therie-i osettsüt nung jenjang ajungketba tebilemstsü lemsatemp

Dimapur, Monupii/May 13 (TYO): NPCC tir K. Therie-i sangdong ka ajanga, state nung oset jenjang taziokba makai ajungketba atema shisabulua bilemba lemsatempogo. State mokdanga ayuba ajanga nüburtem shisabulutepa shishilembatepba maongka agia shishilembartemi oset mali ta shia osettsüttem nung jenjang ajungketba ajanga nüburtem kanga kangshiteper, ta pai ashi.

Oset jenjang aziüoktsü atema sorkar mulungi maruru, shirnoki oset jenjang aziüokba nung tamakok nguogo, kechiyong parnok chubatem ama liteter aser sensaker tem amadoker, shirnoki seret ka nung sen 10 ajungketba-a metozüker, ta paisa ashi.

Wholesaler aser retailer temi oset maliba dak atemer sensakertem ket nungi rakzurakdemer. Iba dak alia nüburtemi, tangalen nungi bener

aruba oset ajak atema wholesaler aser retailer tem ajanga sorkar 11 nem saru agütsür. Nüburtemi kidanger telungpurtem nema saru agütsür, police tem nem gate ajak nung aser Taxes, Forest, Excise, Geology & Mining densema tanga Government agencies tem nem saru agütsür, ta paisa ashi.

Linük ajak nung obendanger mesera Economist ka tekolak ser Independent Pricing Commission amenoka lir. MRP ya iba commission yagi achaayananger. Jenjang nung aibelenba ya nüburtem anema lir, ta Therie-i ashi.

Sorkar ya nüburtem atema tajangzüik agütsüba sorkar aser party sorkar mesera mangoka angurtem kar atema masü. Nüburtem rongsenketsing achaayangtsü aser rongsenketsing renlokyonga odaktsütsüba ya welfare sorkar ka mapa lir, ta NPCC tir-i ashi.

State nung May 17 nungi arishi küm 18-44 pur COVID mozü agütsü

Kohima, Monupii/May 13 (TYO): State nung arishi küm 18-44 tsingta alir nem COVID-19 mozü ya May 17, 2021 nü nungi agütsü tenzüksü, ta State Immunization Officer (SIO) Dr Ritu Thurr-i Brehostibarnü metetdaksü.

Ministry of Health and Family Welfare ajanga lemezüktsüba ama state-i sen agütsüba sülen Serum Institute of India nungi COVISHIELD mozü doses 36,580 Bodhbarnü Nagaland tonga liasü.

Thurr-i ashiba agi, COVID-19 vaccination centre nung slot aliba nung ajemdaker arishi küm 18-44 pur mozü agütsü atema registration aser makaa ayuba maparen ya May 14, 2021 anepdang 9:00 ako nungi tenzüksü. COWIN mesüra Aarogya Setu ajanga mozü agütsüpur ajanga tenüng zülüoktsüla, ta ashi.

Mozü agütsüba tesem nung oa tenüng mezülüoktsü. Taoba mapang register süa alirtemi

COVID-19 vaccination centre mashi ka nung oa slot makaa ayutsüla. Arishi küm 18-44 pur nem mozü agütsüba maparen ya May 17, 2021 nungi tenzüka shimteta aliba COVID vaccination centre tem nung dang agütsü, ta health ketdangsurü ashi.

Hopta shia Hombar aser Mongulbar anogo ya shia aliba arishi küm 18-44 tsingta alirtem mozü agütsü atema wazüka ayutsü aser tanüngba anogotem ya district ajanga sentong yangluba ama arishi küm 45 nungi temapur atema wazüka ayur.

Tenüng zülüoka aliba mozü agütsüpurtemi COWIN portal mesüra Aarogya Setu App nung amshiba photo identity card kasa bener vaccination centre semdangtsüla. Mozü agütsüpurtem mask inoktsüla, nisung o nisung tsingta tepila ayutsüla aser teka müreka ayutsüla, ta ashi.

COVID-19 mesükba tashidak keta alirtem vaccination centre-i aittsü memelatsü. Taoba mapang state sorkari arishi küm 18 nungi tema nem mozü ya angati agütsütsü telemtetba agiba sangdonga lir.

Nagaland nung nisung 366 dak COVID-19 putet

Tanü state nung nisung 366 dak COVID-19 positive putet. Dimapur nung 164, Kohima nung 128, Mokochung nung 13, Wokha nung 12, Zunheboto nung 12, Kiphire nung 10, Mon nung 9, Phek nung 7, Tuensang nung pongu, Peren aser Longleng nung asem-sem, ta Minister, Health & Family Welfare, S. Pangnyu Phom ajanga March 13, 2021 nü Twitter nung metetdaksü.

Kasa mapang nisung 91 taneptsü ngua liasü, Dimapur nung 66, Mon nung ter, Kohima nung ti, Mokochung nung trok aser Zunheboto nung ka, ta paisa ashi.

Kohima DC 'lockdown' tetuyuba agütsü

Dimapur, Monupii/May 13 (TYO): Nagaland nung COVID-19 tashidak menatempa aoba nokdangtsü atema Home Department aser state sorkar tetuyuba dak ajemdaker Kohima district atema Kohima DC-i tetuyuba kar agütsüogo.

1. District mokdanga aliba mapang teküboklen agüja alirtem dak alaka nisungtem senzisenpongtsü memelatsü. i. Tenokdangba agütsür aliba mapang essential commodities/ chiyongtsü aser oxygen/oxygen cylinders aser tanga medical equipment densema medical supplies tem belenshiba garitem senzütsü melatsü.

ii. Animal healthcare densema COVID-19 vaccine agütsüpur aser tashidak tendangtsüpurtem senzütsü melatsü aser healthcare facilities, pharmacies, hospitals, clinics, nursing homes ajak lapoktsü.

iii. Governor Secretariat, Chief Minister Office, Chief Secretary Office, Guwahati High Court Kohima Bench aser District Courts, District Administration, Police, Security forces, Fire & Emergency Services, Home Department, Medical, Postal Services, NIC, NSDMA, Home Guards & Civil Defence, SDRF, Power, PHED, Food & Civil Supplies, Finance, Taxes, Treasury & Accounts, Banks/ ATMs, IT&C, IPR, AIR & Doordarshan, Social Welfare Department, Sakhi One Stop Centre, Women Help Line, Child Protection Services, Anganwadi Services, LPG Services delivery, distribution aser transportation, Private Water Tanker/ Carriers, Prison aser iba dak sendakba aliba service tem, Courier Services, Municipal Services (cleaning & sanitation), Food Corporation of India (FCI), Directorate of State Lotteries, Power Grid Corporation of India Limited aser Administrative Training Institute (ATI)

ketdangsur aser staff tem ajak senzütsü melatsü.

iv. Agriculture aser allied maparen aser construction mapatem asoshi temelaba agütsütsü, saka contractor/kiburtemi COVID-19 inyakyim shidak benoktsüla. Mapa inyakba tesem nung oa alirtem nem dang mapa inyakdaksütsü aser tangalen nungi mapa inyaktertem anir arutsü memelatsü. Mapa inyaktertem anenzükba tesem nungi mapa inyakdak tesemi mapa inyaktertem anir aotsü atema contractor/kibur-i anepalutsü.

v. Petrol pumps ajak lapoktsü melatsü saka nisung aika mesentepdaksütsü.

vi. Electronic aser print media, telecom/internet service providers nung inyaktertem senzütsü melatsü.

vii. Aonsotsü, shi/angu, mamatzü, bakeries, shiruru atema chiyongtsü ayokda densema local grocery stores ajak anepdang 6 nungi 12 ako tashi pei colonies/Wards nung anogo kaka thir lapoktsü melatsü (17, 19, 21). Nüburtem pei kiyong nung dang tenüngdakba osettem alitsü.

viii. Nisung anenzükba hotel tem nung staff ajemer lapokdaksütsü.

ix. Asüpila sentong nung nisung 20 dak tema adenshitsu memelatsü.

2. I(ii) nung shisema aliba shops/ business establishments tem dak alaka PR Hill junction nungi Jail Colony densema highway nung amenoka aliba shops/ business establishments tem aser BOC, High School Junction aser Keziekie amala tongtibang shishilembadak shibanga atatsü.

3. Restaurants tem shibanga atatsü.

4. Lokti adenshiba tesem ajak shibangtsü aser social/ political/ sports/ entertainment/ academic/ sobaliba/ tamangba yimsü dak sendakba

sentongtem aser lokti tulu adenshiba sentongtem agütsü memelatsü. District Task Force nungi temelaba agir kiyimba benjung agütsü melatsü, saka nisung 20 dak tema adenshitsu memelatsü.

5. Medical emergency dak alaka private aser public transport vehicles tem senzisenpongtsü memelatsü. Jongdak maparen atema senzüba garitem nung nisung tesadang dang senzüdaksütsü. Ajisiaka Serial Number 1(iii) nung shisema aliba ama department maparen atema senzüba sorkar garitem senzisenpongtsü melatsü, saka ID card tejangja den departments maparen tejangja sayutsüla.

6. Tanga state nungi arurtem aser state yongtsü nung senzisenpongtertem dak sendakba nung Revised Standard Procedure (SOP) dak ajemdaker state yongtsü nung nüburtem senzisenpongtsü melatsü.

7. Administrative Heads of Departments/Heads of Department/Head of Offices aser departments shia officers/ staff core group-i okadak ken o tem densema jongdak maparen ajak achaayangtsü. Tanga sorkar tenzükerem ajak nungdak adokba mapang yariteptsü atema renema alitsüla.

8. Nüburtem nungdakba makaba nung senzisenpongba nokdangtsü atema Kohima district entry points; Khuzama, Peducha, Tseminyu aser 10 IR Zhadima nung meita atatsü.

9. Tetuyuba sülen manidakba kija aser lokti ajak Indian Penal Code Section 188 aser Disaster Management Act 2005 dak ajemdaker tapet temerenshi agütsütsü.

Kohima District ajanga May 14 nü nikongtsütsü 6:00 ako nungi tenzüka May 21 nü tashi mokdanga ayutsü.

Yisemyong nung Poultry Management training katsü



Dimapur, Monupii/May 13 (TYO): KVK Mokokchung-i ayongzüka poultry management dak sendakba nung Skill Training of Rural Youth (STRY) sentong ka Yisemyong nung May 5 nungi 11 nü tashi agiogo. Iba sentong ya State Agricultural Management and Extension Training Institute (SAMETI) aser National Institute of Agricultural Extension Management (MANAGE) den longjemer ayongzüka agi.

Training lapokba sentong nung okila jembiba mapang

Senior Scientist & Head, KVK Mokokchung, Dr. Keviletsu Khate-i skill development koda tongtibang iba dak rangloker jembiba. Paisa, STRY aser poultry management nukjidong lemsatop. Pai training nung shilem agirtem dang, training nung shilem agiba maongka takok tashi agitsü ajungshi.

Hopta tepeyong training agiba mapang onük balala benoka tangazükba agütsüogo, kong poultry production, poultry production tapu balala aser inyakyim, osang tsüsang agiba yimya aser ICT amshiba,

poultry production, management nung ethoveterinary inyakyim, poultry farming nung entrepreneurship, poultry enterprise mesüdahtsüi aotsü atema sentong yanglutsüba, poultry shishilembaba, tajangzüktem, agro-metrology aser poultry production koda tongtibang aser wara pokteter aliba mapang maongka aser tetsükdaktsütem densema liasü.

Training sentong nung tetsür 15-i shilem agi aser parnok nem kuli kaket tajung renema agütsüogo.

Mon nung aluyimer aser Scientist sensaksem sentong ka agi



EAC, Mon M Ozukum, shisalen agütsürtem aser sentong nung shilem agirtem tangokba noksa nung angur.

Dimapur, Monupii/May 13 (TYO): ATMA, Mon-i ayongzüka DAO Conference hall, Mon nung May 12 nü Fall Army Worm Pest Control & Management measures dak sendakba nung aluyimer aser Scientist tem sensaksem sentong ka agiogo.

Sentong nung shisalen agütsürtemji Daniel Konyak, Agricultural Officer, Mon, Imnuksangba Horticulture Officer, DHO Mon, Shampa Konyak, ATM, ATMA, Mon aser Wennyei Konyak, ATM, Mon nung liasü.

Iba sentong ya EAC, Mon Molosangla Ozukum-i lapoktsü. Sentong nung o jembiba

mapang Molosangla-i, Nagaland nung jenjang menjang nung Fall Army Worm ajanga kongshiba indang lemsatop aser iba mesen agi tamajungtiba kongshir aliba district tem rongnung Mon jenjang 4buba nung lir ta ashi. Laisa, aluyimertem dang sentong nung temulung agüja adentsü aser parnoki ajangshiba tetsükdaktsütem indang Agriculture, Horticulture aser ATMA ketdangsurtem den tatongi sensak asemstü ajungshi.

Technical session nung shisalen agütsürtemi Fall army worm ajanga takoksa bener arutsüba aser iba ya inyakyim

tajung benokba den Mechanical, Biological aser chemical amshia koda azüoktsü iba indang lemstep.

Aluyimertemi Pheromone traps, Organic Neem aser tanga süngolembatem amshia mesen prokshiba nokdangba indang lemsatop. Sentong nungsa aluyimertem nem Pheromone scachets, Pheromone traps aser Organism Neem Oil lemsü.

Iba sentong ya N Subenthung Odyuo, Dy.PD lenisüba nung agi aser Farmers Friend ATMA Yenwang-i sarasadema liasü. Maneni sentong nung Dy.PD, ATMA Mon I Nuchet-i tepela anküp o jembiba.

Mangkolemba Task Force for COVID-19 senden menogo

Dimapur, Monupii/May 13 (TYO): Mangkolemba Task Force for Covid-19 aser Mangkolemba jila kübok ward ajunga indang chairmen tem den senden ka ADC indang Conference Hall nung May 12, 2021 nü Additional Deputy Commissioner, Mangkolemba,

Dharam Raj, IAS lenisüba kübok mena liasü.

Iba senden nung mendenpubai lokti dang sorkari state nung COVID-19 tashidak züina akumba azüoktsü aser nokdangtsü atema totuyuba balala agütsüba rasaa ashi.

Iba senden nung Ward Task

Force tenteta aser jila kübok tongtipang check post tem anüktsüba indang jembiba liasü.

Iba senden nung ward ajuna nungi chairmen tem den Mangkolemba Watsu Mungdang aser Mangkolemba Ao Lanur Telungjem nungia teshimtet nübu arua dena liasü.

DoSE ajanga Graduate teacher indang Seniority List saya

Dimapur, Monupii/May 13 (TYO): Directorate of School Education ajanga sangdong ka nung ashiba agi, 30/04/2021 tashinung Tentative Seniority List of Graduate Teachers adokogo aser iba Tentative Seniority List nung ashishiteptsü lira iba osang sangdonger anogo 30 tsungta Department indang website <https://education.nagaland.gov.in> nungi copy agizüka ashishiteptsü akok.

Graduate Teachers indang Tentative Seniority List ya tsunglangen agüja aliba telemasa nung ajemdaker renema liasü:

1. Seniority List ya Hon'ble High Court ajanga Writ Appeal No. 16 (K) of 2017 aser Writ Appeal No. 17 (K) of 2017 nung ajemdaker 12/12/2019 nü obendang agütsüba principles nung aliba ama renem.

2. 2009 küm sülen shimba tesayurtem ya parnok shimba dak sendakba mangatetep aliba ken o tem tembangba sülen ang Seniority List nung inoktsü. Court ajanga totuyuba agütsüba ama Graduate Teacher tem indang Final Seniority List maparen inyaksü atema iba mera ya agi.

3. Tesayur shirnoksa tanaben AEOs/SISs mapa nungloktsü aser iba seniority list nung sayua ali, parnok ya otification No.DSE/ESTT/SIS/1-72/2015 Dated, 27th January 2017 anser 14th August 2017 indang Condition No. (ii) agi awabangtsü.

4. Tesayur shirnoksa

Department indang administrative office balala nung attach süa ali aser Hon'ble High Court Order Dated 08/04/2021 of Case No. WA7/2020 obendang küboki aiter, parnok danga Seniority List nung inoktsü atema latetja aliba mapang nung nungdakba document tem agütsütsü metetdaksü.

5. Date of Appointment Order/ Date of Birth/Graduate Scale Order/Regularization Order/BA Mark Sheet/ Incomplete Documents amala document mabensa Seniority List nung inoka aliba tesayurtem dang jangjashitsü atema latetja aliba anogo tashinung kasaji agütsütsü totuyuba agütsü. Latetja aliba mapang nung nungdakba document magütsüba tesayurtem tarutsü nung temaba jenjangi majungkettsü aser parnok indang seniority position nungi agientsü.

6. Bendena Directorate of School Education nem agütsütsü atema tesayurtemi nungdakba document ya pei DEOs/SDEOs nem agüja aliba mapang tashinung agütsütsüla.

7. Ashishitsü/tai aputsü lira, iba osang sangdonger anogo 30 tsungta pei DEOs/SDEOs nem agütsütsüla aser yangi tapet document tem dener agütsütsüla.

Mapang latetja alidang ashishitepba mesüra tai apuba magütsüra ajak shidak inok amai züngshitsü aser mapang süyir agütsübatem 'invalid' ta züngshitsü aser magizüktsü, ta sangdong ajanga ashi.

Wokha nung tapi agi COVID-19 tashidak tendang



Dimapur, Monupii/May 13 (TYO): District nung COVID-19 tashidak wara sashia akumba mechi, Wokha District Task Force for COVID-19 ajanga taxi counter, daily bazaar aser Police Point area ama tongtipang tesemtem nung May 12, 2021 nü tapi agi COVID-19 atema sample bendena tendanga liasü. Nüburtem rongnung iba tashidak menatepa aoba anendaktsütsü atema mera agitsü asoshi iba mapa ya inyak.

Iba mapang ajak senteper nisung 121 dak sample agizüker tendangba nungi nisung trok dak COVID-19 tashidak aliba putet.

Par trok prong dak iba tashidak agi timtem agütsüba meliasü aser parnok ya SOP nung shia aliba ama home quarantine asütsü ashi aser iba mapang Medical team ajanga nungdakba totuyubatem agütsütsü.

Medical team ajanga tsüingsü aputsü, ta metetdaksü aser nüburtem dang sorkari agütsüba SOP sülen anidaktsü ajungshia liasü.

Wokha District Task Force pur lia item tetendangba ya agi aser ano maneni tashidak prokshia aoba nungi jenbuttsü mechi tendangtsü, ta sangdong ka ajanga ashi.



May 13, 2021 nü Assam CM Himanta Biswa Sarma-i Majuli nung Dakhinpat Satra semdangba noksa nung angur.

Assam: State NRC Coordinator-i SC nem petition ka agütsü

Guwahati, Monupii/May 13 (Agencies): Assam State NRC Coordinator Hitesh Dev Sarma-i, draft NRC aser supplementary list tanaben asdangshitsü khanga Supreme Court nung temepeshiba ka benokogo.

NRC (National Register of Citizens) final draft ya 2019 küm August ita 31 nü sangdonga liasü.

NRC Coordinator Hitesh Dev Sarma-i temepeshiba nung, NRC final draft aser iba indang supplementary list nung aibelen aliba aika potetogo, ta ashi.

State NRC Coordinator-i,

District Judge, District Magistrate aser Superintendent of Police densema monitoring committee ka tawabangba kübok iba list tanaben asadangshitsü mepeshia asüngdangogo.

Hitesh Dev Sarma-isa temepeshiba nung, temsüa malir aika list nung züngoksema lir aser temsüa alirtem aika list nung züngoksema mali, ta ashi.

Supreme Court nem agütsüba temepeshiba nung Sarma-i, aibelen maliba NRC ka renemtsüji national security atema kanga tongtibang, ta ashi.

Temetetsükaji Assam Chief Minister Himanta Biswa

Sarma-i taoba mapang state sorkari NRC tanaben asadangshitsü atema asüngdangtsü ta shiogo.

"NRC dak sendakba nung onok tebilemba tejangja. Onoki Bangladesh den arrtsü nung aliba district tem nung list shilem 20 aser tanga district tem nung shilem 10 tanaben asadangshiner. Iba sülen NRC shidak ta ngutetra state sorkari agizüksüla aser tejakdangi bener aotsüla. Ajisiaka NRC asadangshiba sülen aibelen aliba ngutetra onoki Supreme Court nem iba ken o süoki ia agidakttsüner," ta Himanta Biswa Sarma-i ashi.

Assam: Army 4 Corps-i oxygen yipden 45 aser ICU 5 amenoktsü



Guwahati, Monupii/May 13 (Agencies): Indian Army, 4 Corps koba Tezpur, Assam nung amenoker lir, parnoki linük nungdakba mapang maneni tejakdai arua teyari agütsüogo.

4 Corps koba dang Gajraj Corp ta ajar parnoki Tezpur Medical College Hospital (TMCH) nung oxygen facility aketba yipden 45 aser ICU 5 amenoktsüogo.

Oxygen facility aketba yipden aser ICU tem ya 4 Corps-i otsü sütsüsa anogo

asem nung dang amenokja liasü. Assam sorkari teyari agütsütsü asoshi mepeshiba sülen 4 Corps-i Tezpur Medical College Hospital (TMCH) nung item yipdentem ya anepaluja liasü.

Iba dak sendakba nung Assam Chief Minister Himanta Biswa Sarma-i 4 Corps nem tenüngsang tulu agütsüogo.

"Mapa tulu ka inyaktetogo. Tenüng asangtsü langa mapa tajung inyaktetba atema GOC aser par team dang kanga pelar,"

ta Assam Chief Minister Himanta Biswa Sarma-i ashi.

"Oxygen facility aketba yipden tem agi kanga anünga kümard. Onoki mepeshba sülen Tezpur Medical College nung anogo asem tsüngda Tezpur nung menoker aliba 4 Corps HQ-i ICU 5 aser oxygen facility aketba yipden 45 amenoktsüogo," ta Assam CM Sarma-i ashi.

Temetetsükaji Assam nung taoba ita nung COVID-19 tensa kanga mejungi kümer lir.



Bodhbar aonung (May 12, 2021) Nagaon district kübok arem shiti aika tzüngi agi aiset. Item rongnung shiti pezü rongsar liasü aser asem tasü ngutetba noksa nung angur.

Mizoram: Doctor aser medical staff 400 dak temai sorkar nem teyari agütsüdar

Aizwal, Monupii/May 13 (Agencies): Mizoram nung nübu agi anünga aliba mapang ka nung doctor, nurse, lab technician aser health workers densema nisung 400 dak temai Covid-19 den raratsü atema sorkar nem teyari agütsütsü asoshi pei mapa tenlaogo, ta health department ketdangsur kati Bodhbarnü metetdaksü. Item nisungtem ya timba mapa mongui alirtem lir.

State health department joint director (Planning) Dr C Lalzepui-i, Covid-19 agi shiranger tali akümba ajanga state sorkar tang facility aser nübu agi anünga timtem nung lir, aser iba atema nursing institution aser medical institution tem nungi sorkari volunteer tem bushia liasü, ta ashi.

Tang tashi nung volunteers 412-i sorkar nem teyari agütsütsü mulungtetogo aser parnok ajak tang sample bendenba, screening, contact tracing aser Zoram Medical College (ZMC) aser Covid-19 Care Centre tem nung Covid-19 agi shirangertem nem teyari agütsüba amala maparen balala nung amdaker inyakdar, ta lai ashi.

Volunteer 412 rongnung doctor 37, nurse 144, healthworkers 97, lab technicians 91 aser pharmacists, dialysis technicians aser teyaritertem densema lir, ta lai ashi.

Iba dak alia nisung aikati vaccine agütsüba nung teyari agütsütsü atema tejakdangi aruogo, ta lai ashi.

Lalzepui-i ashiba agi, 2020 küma Covid-19 dak sendakba maparettem nung doctor, nursing student aser tanga medical

student 900 shi-i teyari agütsüogo aser iba ajanga state nübu agi manüngi liasü.

Kasa mapang nung Covid-19 agi shirangertem anepalutsü atema state sorkar mozüki agi anünga kümard.

Tang tashi nung Covid-19 Care Centres (CCC) 42 (capacity 2,295) aser Community Covid-19 Care Centres (CCCC) 22 (capacity 22) amenokogo, ta Lalzepui-i ashi.

State nung taa agütsür temang anepaluba Covid-19 Care Centres ana (capacity 41) amenoka lir, ta laisa shisem.

Tashidak keta aliba temaitsü sayurtem Zoram Medical College (ZMC) nung temang anepaludar aser tashidak temaitsü mesayurtem CCC aser CCCC tem nung temang anepaludar. Mizoram nung Covid-19 atema bendanga agütsür aliba mozüki ji Zoram Medical College kija lir.

Kasa mapang nung Aizwal nung amendaker aliba Regional Institute of Paramedical and Nursing Science (RIPANS) indang principal Dr. H. Lalrinmawia-i, institute nungi kaketshir 70 shi-i Covid-19 management atema teyari agütsütsü mulunga agizükogo, ta ashi.

B.Sc nursing kaketshir 30 shi vaccine agütsüba maparen nung sodaka lir aser tangertem sample bendenba maparen, data operation aser CCC tem achaayangba maparen nung sodaka lir ta paisa ashi.

Mizoram nunga anogo ka nungi ka ta Covid-19 tensa tamajungba küma odar.

NF Railway-i coaches 288 isolation wards küma yanglutsü

Guwahati, Monupii/May 13 (Agencies): Northeast Frontier Railway (NFR)-i, passenger coaches 288 Covid care isolation wards küma yanglutsüogo, aser tang amenoka aliba railway hospital trok nung oxygen plant amenoktsütsü asameyangdar, ta NFR General Manager Anshul Gupta-i Brehostibarnü ashi.

Gupta-isa, state balala nung covid dak sendakba nung tenüngdakba balalatem peritsütsü atema passenger coaches 288 Covid care isolation coaches (yipden 4,608) küma yanglutsüba sülen North east nung aliba state balala nem agütsüogo, ta ashi.

Iba osang ya pai Guwahati nung NF Railway headquarters nung osangbenertem den virtually sensaksemba mapang ashi.

NF Railway ya India nung railway zones 17 rongnung ka lir aser Meghalaya o Sikkim na madeni northeastern state trok, West Bengal nung district tenet aser north Bihar nung district pongu nung inyaksangshir Gupta-isa, NFR-i Covid

tashidak menar alirtem temang anepalutsü atema railway indang mozüki trok, kong yipden 354 lir item mozükitem nung facility agütsüogo, ta ashi.

Special ward ajak nung Covid tashidak keta aliba temaitsü terara sayurtem anepalutsü atema tenüngdakba healthcare facility tem ajak keta lir. Ketdangsurü ashiba agi, taoba ita nungi tang tashi nung railway indang mozükitem nung Covid agi shiranger 477 anepaluogo.

NF Railway GM-i ashiba agi, Maligaon, New Bongaigaon, Lumding aser Dibrugarh (ajak Assam nung), Katihar (Bihar) aser Alipurduar (West Bengal) nung oxygen plants trok amenoktsü sentong lir.

Maneni Gupta-i, tang tashi nung NFR employee aser engineer 2,500 tema dak tashidak potetogo aser parnok 1,500 taneptsü ngur maneni mapa nung sotaka lir ta ashi.

Paisa, NF Railway-i wara pokteter aliba mapang Assam, Tripura, Manipur, Nagaland aser Arunachal Pradesh nung freight train 7,339 inyaksangshidakttsüogo, ta ashi.



TIR YIMYIM YIMOBILEM (EDITORIAL)

DIMAPUR ROGONÜ, MONUPII (MAY) 14, 2021

Tajung akümtsüba mapang

Mapang mapang shia tzüpu menena kümer külen shitokba ama, alima nung nisungtem libaliro aser sobaliba kodang kanga menena kümdir, Tsüngremi mapang mapang shia tzü agi shidokba aser mi agi rongdokba otsü asenoki meteta lir. Aji oda, tanüa alima nung tashidak wara tamajung aruba ya alima temerükba aser tajungba küma yanglushitsü asoshi atalokba Tsüngremer sentong ka asü ta bilemer. Alima nung tajung akümba aser tajung anguba shia ya tamalen kanga timatamba aser takoksa ajuruba otsü kakabo alitsü. Aji oda, honzük aser keritajungbajia mi kanga tatsük nung ronga-ronga akushia yangluba agi topur junga yanglutet. Ibaji mesüka asenoka aika tamalen kanga timtema aliba agi tajung aküm aser kanga shirangba agi temulung meyip ta asüba otsü alitsü. Itemji mesüka tanü putu nung alima meimchirtem libaliro kanga mejungi küma aoba ya anendaktsür, loktiliba aser sobaliba tajungba ka tenzüksü asoshi tashidak wara tamajung ka poktetogo ta angatetter. Asenokbo kibalembotsü asoshia kasa kidongbo melemudaktsür, saka kidong otsüjibo yutsür, joko, alima nung tetsür o tetsür na aser tebur o tebur na apuani küma arogoi dena tsüngrem tenung nung kibong kümstsür. Aji oda, joko asen lima nunga, talisa Dimapur nungbo, aonung sangwaa yi jemtepa tsüngsangtepa kazüdak tesem balala lapoka business inyaktsü tenzükya liasüba mapang tang tashidak wara agi anendaktsüogo. Joko, asenok aika Tsüngrem masü rongsen bushiba nung dang temulung agütsür, sentepibo maor saka tenlabo agütsür, lenmang dang adokra kecha arendaka melii ochimashi mapa inyaker aser iba nung jagi agiteta Tsüngrem mapa inyaker ta kobaang shitak aser kobaang meshitak mebenteti asen angutsü aser akatsü atema inyakba mapatembo ajak shitak kümdaktsür aliba mapang ka, asenok ajak remoka asütsüsa mapang ka aruogo. Aji oda, asenok kinunger ajak sür asenoki tangar meyong dena agizüka bendenba rongsen ya kechi akümtsü (?) ta asüba shisabolubang tuluba asenok aika asoshi kümogo. Iba ama shisaboluba shisatsü jagi asenok ajak nem alima nung tim mesüi inyakba mapatem aser tim mesüi bendenba rongsentem ya amajok ta angatetdaktsür. Iba jagi asenok nem tepela, tesünep aser teimla magütsür. Nisung ka taküm aliba mapanga aser tasütsü mapang atongdanga tepela aser tesünep yabo ochishia aliba aser temeim mapa inyakba nungiang arutsü. Tanüba asenok aika alima mesama tashi peritsüsa ali rongsen bendenba yur oxygen-a magitet asütsüba tensa mapang kati menepogo. Ashiko, alimabo mesamatsüa akok saka asenokbo samatsü. Iba tangatetba nungji asenok mesamadang, asenokia tang aser tarutsü nung alima nung alirtem asoshi kechi tajung inyaktsü ta bilemdanga asenok ajak nisung tajung kaka akümba mapangji tang ya asütsü. Atangji, alima tasenba nunga takar sensaker aser tulur tilar ajak alitsü. Tetezü, tashiyim aser ochimashi mapatem meinyakra takar makümtsü ta masü, saka Tsüngremi takar kümstsütsü purtem nem pei inyakba nung moatsütsü aser sensakertema pei mapang nung akatsü. Ajisüaka, Tsüngremi moatsüba masü saka peisasa akaba rongsentemjibo khen nung maka akümtsü ta Laishiba nunga asenok dang shia lir. Ibaji asenok nem angatetdaktsütsü nenshir amai asenoki tang mapangba ya agitsüla. Aji oda, asenokbo tang ama, ni, kü kisung ta masü saka onok kinunger ajak wara nung ya mekümzükteti süra, koda (?) ta shisabolua bilemba mapang ya asenoksasa asenok tai nangzüka temulung melenshir, tang nungibo asen kisung agitsü, akatsü ta masü saka külem nübortem jenjang tajungba nung kodaser alitsü ? Ozü lima aser onok yimti yimdong komaser topur junga akümtsü ? Komaser nübortem sen meindoki anameta mozü ki tajung nung taneptsü angutsü ? Komaser sen meindoki ana nung shisaliok tajung angazüksü ? Komaser ni mesüra onok mesük ozü lanurtem ya tajung akümtsü ? Komaser nia yimten, lokti aser arogo nung ochishia shilem agitsü ? Komaser ni masü ozü lima takar kümdaktsütsü (?) ta bilema tajung akümba mapangji tang Covid agi amokmerenba mapang ya asütsüla. Nisung ka tajung akümtsübaji kodanga menua maka. Auersangbo kangki nungang tajung akümba otsü asenoki meteta lir. Aji oda, asenok asoshia mapang tamajungtiba ya tajung akümtsü asoshibo mapang tajungtiba asütsü.

OLEMSABANG

AROGO ASER LAISHIRI YAMAI CLEAN ELECTION NUNG SHILEM AGIDAKTSUNER

- Dr. T. Jamedi Longkumer, Assistant Professor,
Dimapur Government College

Okila

Iba YSS online sabang nung Clean Election den sendakba onük aibenjembia arudaki. Naga lima nung Clean Election Campaign(CEC) Nagaland Baptist Church Council ajanga 2012 küm tenzük aser State Assembly election ana (2013 & 2018) mapangiba wadang kanga meranga Arogo, laishir aser nüburtemi inyakogo aser nisung aikati CEC ajanga election nung temelenshi bener aruba aser takok anguba indang jembir. Nagaland State election 2018 temer külen NBCC tongti lenir ka dang media interview nung CEC indang asüngdang dang pai yamai langzü, "The campaign was more successful this time (2018 election). We are doing well so far; not all, but majority of the people have been impacted." Pai Clean Election Campaign ajanga Naga nunger tiemba ka takümnung impact/influence süogo, tetezünisung jenti taküm nung temelenshi adoktaktsüogo (election related nung) ta ashiba oji hau ta agizüksü kanga tasak amai nibo bilemer. Kechiyong, mezüngbuba nung,tesüba election nung clean election platform ajanga candidate kadanga takok mangu aser tanabuba nung,constituency ka nung dang clean election principle nung nüburtemi vote agütsüba mali.Clean election activities aika conduct asü aser sensaksem/mensem jenti ayong,saka tatem nungba akhi tejen yimya nungdang nüburtemi vote agütsü. Shirnoki rongsen tiemba indoka nüburtem vote alizük, shirnoki bangdak tashi teyari/support, sen aser kidong/yim/tsükong politics ajanga ngutet parnoki election nung takok angu. Seminar, workshop, interaction aser social media ajanga Naga nunger aikati clean election indang angashia metetogo südi saka metetbaji implement mesütet aser mapa küma meinyaktet. Theoretical knowledge metetba kisüngjibo amajok, implement mesütetba aser mamshitetba tashitemetjibo impact/tajangzük mali. Denial nung asenok melili - it is what it is! Clean election campaign has been a clear failure in Nagaland thus far.

Kechiba Naga lima nung CEC tamakok angu?

Arogo aser Laishiri ayongba CEC ya kechi komala tongpang ka? Iba tongpang nung tsükchirji kechi? Iba tongpang akoktsü atema kechi tenokdangbatem/challenges/barriers/hindrances anema raratsüla? Iba tongpangji asenoki size-up sür ma? Iba tongpang magnitude-ji asenoki angatetogo ma?

Itemtasüngdangba telangzübabushitsü atema tesüiba election mapang tatalokba otsü ka tongmelang agi study asütsü merangdi. 2018 election nung asen Aor sensotemi clean election agenda/platform nung contest asütsü merangba indang ni jangja memetet, saka Kohima district nungbo Angami nunger ka contest asütsü merangba indang kanga otia media aser public domain nung jembia prokshiba asenoki metet. Rev. Dr. Mazie Nakhro, shiba Jotsoma yim nungi laishir ka lir pai clean election platform nung Western Angami constituency nungi election contest asütsü mulungtet. Rev. Mazie-i yamai ashi,"I decided to set an example by contesting in the elections on two platforms - NBCC's clean election campaign and the anti-corruption stand of ACAUT (an anti-corruption organization)." Kodang pai yamaji contest sünüba declaration agütsü par kidong (Nakhro) aser par yim (Jotsoma) putu menden-i pa candidature anema apusoa noktak. Kidong aser yim putu mendeni pa dang yamai ashi, "Na clean election platform nung election tokteptsü merangbaji amajok, tangar yim nungi tokteper candidate anema nai kodanga takok mangutsü, nai ochishia merüka election contest asütsü merangra nai tangar makoktsü aser asen kidong/yimer takoksa tulu asutsü" ta shia pa contest nungi candidature anogo ishika tsüngda nung withdraw südaktsü. Pa withdraw südaktsür külen par kidong nungi tangar ka kidong candidate ama shim (shibai clean election agenda/principle magizük aser sen/tashiyim amshia election tokteptsü/contest asütsü mulunga liasü), aser iba nisung yimer senso candidate ama election-i ai aser takok angu. Iba "Interesting social experiment of a Clean Election contestant: Rev. Dr. Mazie Nakhro'scase" nungji asenoki'Naga nunger politics' noksa jangja angur. Pai 'Naga nunger election yimya - Naga election style' nung election contest asütsü memulungba agi par kidong aser yim putu mendeni pa election nung contest mesüdaktsü. Rev. Mazie-i 'Naga nunger existing election culture' anema aposoa tasen election culture/sobaliba ka tenzüksü merangba yong pa candidature magizük.

Contemporary Naga election culture kodang aroka examine südir asenoki tongtipang determining factor ana ajitettsü: Sen (money) aser Senso (identity). Iba tashi/power/factor ana-i Naga lokti alena aliba yong Naga lima nung free and fair election tanü tashi magiteter. Sen tashi-i tamakoktsü ajak takoktsü kümdaktsür - sen agi vote alir, muscle/gun power alizüker, local authority/bangdak favour/support angur. Media nung State election analysis report ka yamai adok, "(Nagaland) State's worst-kept secret: that its votes are up for sale to the highest bidder. For years now, elections in Nagaland have seen people voting for the party and candidate willing to dole out the most, in cash, kind, or both." Naga nunger candidate-temi election nung sen indokba indang Kohima based organization YouthNet-iparnok post-election study ajanga yamai ngutet: Rs. 570 crore (2008 Assembly election), Rs 938 crore (2013 Assembly election), Rs 1061 crore (2018 Assembly election). Election Commission report nung zülua aliba agi Nagaland State Assembly election 2018 nung total votes 9,96,170 agütsü, anungji vote ka jenjangji approximately Rs 10,650 atoker.India lima nung election sen indokba aser vote ratio bushidangra Nagalandji teimtiba asütsü südi. Election mapang sen laluba (wastage) aser sen tashi (money power) amshia takok bushiba maparenameshidak aser yamai meindoktsüla ta nüburtemajaki angateta (consensus) maru tashi Naga lima nung free and fair election magitettsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerit angateta agitsü mepishir**

Uganda nung o entepba sülen Muslim nungeri Pastor ka tepset

Nairobi (Kenya) May 13 (Agencies): May 3, 2021 nü Uganda anüdoklen Khristan yimsü aser Muslim yimsü onük nung o entepba sentong ka nung pastor kati shilem agiba sülen ghonda ishika tsungda Muslim yimsü alia amangertemi pastor tepsetogo, ta osang ka ajanga metetdaksü.

Pallisa town kübok Komolo yimdak alir, Pastor Thomas Chikooma, o entepba sentong ka nung adentsü atema jaoka liasü. Khristan yimsü aser Muslim yimsü onük nung o entepba sentong nung pastor-i jembiba o angashiba sülen nisung 14 tashii Khristan yimsü agizük, aser parnok rongnung Muslim nungeri trok densema liasü.

Muslim nungertemi independent Pentecostal Arogo nung pastor, Thomas dang Pallisa jila nung aliba taxi park ka nung o entepba sentong nung adentsü atema arung ta jaoka liasü. Ita ka shi parnoki iba tesem nungji lokti sentong agia aruogo.

Iba sentong nungji shilem agidang pastor-i Khristan yimsü pusema Laishiba aser Koran (Muslim nunger temeshi kaket) na medemdanga jembii, aser ibaji ajanga Muslim nunger densema nisung aikati Khrista agizükba agi Muslim nungertemi tejashi nung Jihadist yimyim- "Allah Akbar," ta ayimdena liasü. Ibayongji pai par jabaso anir iba tesemji toktsür ajen.

Osangbener den jembidang par jabasoi, "Motorcycle ana nung Muslim nunger pezü mener onok süa ao. Ozü ki atongtsü metre 200 shi dang lia motorcycle anaji Nalufenya primary school anasa lemjem nung ozü ki atongtsü lia anen," ta metetdaksü.

"Kübui parnok dak melung kü dang pa sülen talangka pilar anidakang ta ashi; iba sülen ni kübui motorcycle nung mena alirtem denji jembia angu. Parnoki moapu nung o entepba indang jembii tenzük, aser parnok rongnung kati kübu dak teka sangshi. Ni kanga tsübuadok, anungji ni kidangi jena aru," ta pastor jabasoisa ashi.

Pastor kinungtsü,

Jessica Naikomba ghonda ka shi lir kidangi meyipa aruba sülen parnok ishika aniteper raraba tesem jagi ao, saka shinga maliasü.

Pastor kinungtsü, "Onoki maneni kinungbu bushiba mapang tesüsa pa tekolak tangzük aser temelia rangzük tepseta aliba angu," ta ashi.

Pallisa police iba tesem jagi aruba sülen post mortem agitsü atema tasü mangji hospital-i bener ao. Pallisa council lenirtem aser Salvation Ministries International nungi putir, Denis Akora nungeria iba dak sendakba sangdong balala agütsü.

Tanur 11 tebu pastor, Thomas-i anüdoklen Uganda linük nung Arogo 50 tashi tenzüksüogo. Pastor Thomas Chikooma ya nungtugu sayutsüngir ka liasü aser Ngalwe yimdak aliba St. Martin Arogo nung pastor teinyakdak liasü.

Putir, Akora-i, "Tang ama mangyim jashi mapang nung par kibongi

sarasadem, senotsü teyari aser counseling nungdaker," ta ashi.

Uganda linük temzüng nung tamangba yimsü ajak sadoka amangtsü temeden agütsüba dang masü saka pei tamangba yimsü lemsateptsü/ proktsü aser tamangba yimsü melenshitsü atema sensotem nem temeden agütsür.

Uganda nung Muslim nunger nütsüng shilem 12 shi dang lir, ajisüaka linük nung parnoki mapang shia Khristantem anema inyaker.

Tawa Uganda linük nungsa Muslim nungertemi Pastor ka nem miim chidakja südaktsüogo.

Pallisa District kübok Raraka yimdak Raraka Trading center nung Muslim nungeri ali acre pongu nung school ka aser mosque ka yanglutsü tebilemba liasü saka Pastor, Yolonim Oduchu-i parnok dang aliji ayoktsü memelungba agi April 5 nü pa nem miim chisema südaktsü.

ANO GO ABEN TSÜNGREM DEN

Kibuba dak rangloktsü yongyaba

"Iba anogo nung tenarong tajaki kaket nung O-tem angashitsü, aser mejangjaba aser tammang nungi nükpokeri angutsü". Isaia 29:18

Fanny Crosby shiba 24 March 1820, New York yimti nung John Crosby aser Mercy Crosby nem sotsü, la hopta trok (6 weeks) alidang tenük timtem ajurua tia maka taküm tepiyong asoshi tenük pokadok; nükpok süa liakasa lai alima nung talisa Arogotem asoshi ken meyi ti tema mejama yutsüba tenüngsang kentem jenti tanü tekülem ajak nung amangbapurtemi atener, ya tesüngmangtsü Tsüngremer mapa meimchir kati inyaktetba ka asütsü. La dang alimai "Osangtajung ken zülur chubatsür" (Queen of gospel song writer) ta tenüng agütsüba angur.

Khenü lai sayutsüngir tsüngdang yamai ashi, "Ni shimtetsü akok asübo, nibo nükpoker dang süa alitsü shimtetla; kechiyong kodang ni südir, ni mezüngbuba anguba jakji ni moatsüba kümzüksang tejakji asütsü".

Akümüli taküm nung tammang mesüka nükpoker liakasa la tamang ajanga Yisu Khrista jangja jangja ngua liasü ta iba kuli ajanga angateter. Adianu asen koba tia nung lia ali taküm ya tembangdir, khenü lepa aruba mapang Kibuba Yisu jak nung rangloktettsüsa renema lidi.

Sarasadem

Temeim Yisu, kü ali shih tenük aser Tanela tenük anapronglai Ne jak nung teti rangloka litettsü taochi kua. Amen

Wara mapang US nunger million aikati Laishiba azünger

May 13, 2021: Tesüba küm ka tsüngda coronavirus wara mapang nung America nunger Laishiba azünger million aikati timba kümogo, kechiyong 2019 küm den medemdanga 2020 küm nungbo America nunger tain pezü shia nungi katibosa Laishiba azünger, ta American Bible Society's 2021 State of the Bible report ajanga metetdaksü.

ABS-i Mongolbarnü 11th annual State of the Bible report saya, aser iba report nungji US nung tanela jenjang aser Laishiba ajanga America nunger sobalibaren nung kongshiba indang shia lir.

2019 küm America nunger tain million 169-i Laishiba zünga liasü aser iba denji medemdanga 2020 küm nungbo America nunger million 181-i Laishiba züngogo.

Taküm January ita nung online interview 3,354 agiba ajanga iba report asadang, iba denji külemi Gen Z youth nungi anguba telangzübaa asadanga iba report yanglu.

Iba study ajanga yamai bushitet- America

nunger tain shilem 16-i hopta shia anogo timbaka Laishiba azünger; 2020 küm report nungbo iba shilem ya 12 dang liasü.

Tain shilem 34-i, parnoki hopta nung khenbosa mesüra iba dak tali Laishiba azünger, ta langzü aser shilem 50-i, parnoki küm shia Laishiba anaben dang azünger, ta langzü.

Ano telangzüba agütsür shilem 63-i, parnoki 2019 küm azüngba ama 2020 küm nunga Laishiba kasa dang azünger, ta ashi. Ajisüaka shilem 9-ibo, yaküm Laishiba tajemba züngogo, ta ashi saka

shilem 24-ibo yaküm Laishiba kanga tali züngogo, ta ashi.

Kasa report kübok takümsa chapter 9 sayatsü, aser tang sayaba chapter ana ya StateoftheBible.org. nung download sütettsü.

M o n g o l b a r n ü 2021 report Christian Post den interview ka nung jembidang, Ministry Intelligence American Bible Society Director, John Farquhar Flake-i, coronavirus wara mapang nung America nungeri tesünep bushia aser telangzüba bushia Tsüngrem O dangi meyipogo, ta ashi.

Paisa, "Item osang

ajanga nisungtem pei taküm nung temelenshi adokba mapang ka liasü ta sayur. Coronavirus wara mapang nung nisungtemi taküm nung telangzüba bushiba den külemi tesüneptsüba bushir," ta ashi.

2021 report mezüngbuba chapter ji "The Bible in America" aser tanabuba chapter ji "The New Normal" lir, aser chapter ana nungji coronavirus wara ajanga nisungtemi Tsüngrem O den tesendaktep ayuba indang shia lir.

ABS-i tanüngba chapter tenetji June nungi December 2021 tashi nung sayatsü.



May 12, 2021 nü Fatima, Portugal nung aliba Catholic pur temeshi tesem nung Khristantem pilaa mener tekülem sentong nung adenba noksa nung angur. Coronavirus wara prokba nokdangtsü atema May 12-13 benjung anogotem nung temeshi tesem nung ya nisung 7,500 tashi dang adentsü ketdangsertemi tuyuogo.

OLONG PAITEP # 5811

1		2		3		4	5			
				6						7
		8								
9				10		11				
			12						13	
						14				
16						17				

- | | | | |
|----------------------------------|--|--------------------------------------|--|
| TIPIEN | | LANGTSÜNGLEN | |
| 1. Nisung jenti - (5) | | 1. Tenük telong - (9) | |
| 4. Tsük rudenba - (5) | | 2. Committee dang ajar - (5) | |
| 6. Temzüng tesashi - (5) | | 3. Yagi ki okdoker - (7) | |
| 8. S _ _ _ i - (3) | | 5. Yim lenmang - (5) | |
| 9. Nisung telemsa - (3) | | 7. Temoatsü keter meyipa aruba - (9) | |
| 10. Anogoshi - (4) | | 11. Kanga junga menemba - (7) | |
| 12. Ajanga aor - (4) | | 12. Majinü - (5) | |
| 13. Tsük rizüngdak - (3) | | 13. Tzüma nung senzüba - (5) | |
| 14. Tebang nungi adokba - (3) | | | |
| 16. Süngdong tatembangtiba - (5) | | | |
| 17. Meputep - (5) | | | |

OLONG PAITEP # 5810 TELANGZÜBA

- | | |
|---|--|
| TIPIEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina. |
| 19. Sünglang. | |

ALOKBA'ER YIMDAK SORKAR SCHOOL

Alokba'er yimda-k-i School Inspector-ba school semdangi aru.

Inspector : Hai... Na iba school nung tesayur asü ??? Ni school Inspector-ba...Ner School semdangi aruba...Koa tesayurtem aser tanürtem shinga mali ???

Chowkidar : Tulus...Masü ni School Chowkidar-ba ako...Ayyyaaa...kechiba malitsü... Tanü ya ozü yimda-k Chairman-ba'er jabaso sadir.... Iba jagi school sodi agütsüba agi shinga mali adi...Sir ni parnok jar arudi nii...???

Inspector : Nung... Kecha masü odang arung...Ni ne dang langka asüngdangi...Ner School nung tesayur ajak agi kwika.... School tanür-a kwika...??? Aser tesayur temelen (substitute) karbo yua lir mali...??? Ano mid-day meal shitak ngudar sudi...??? Aser aji kechi koma lemsa-a agütsür...???

Chowkidar : Tulus...Tesayur ajak agi ter (10) aser school tanür ajak agi pungo (5) lir adi. Tesayur temelenji (substitute)-ji asem-pezü kabo yua aliya noo.... ashiko yim Chairman...Head Incharge...School Management Board...parnok jala-jabaso kar yua alitsü sudi...mid-day meal jia shitak arua ali-jako...saka ajibo komasalemsa-a agütsür ajibo ni memeteta nooo.

Inspector : Waaaa...!!!??? Ajibo Nabong nem Bati-o lu nuka toktsüba amai dang ado...!!!

Lilir : L.Kika Pongener.

TANÜBO NAI LANGZÜANG

Q. International Amateur Athletics Federation ya _____ küm tenzüka liasü.

A.1982 B.1932 C.1912 D.1952


_____ (Taruba adok nung onoki langzütsü)

YASHI ADOK TELANGZÜBA :China

AO OSHI ANGAZÜKDAK:
TANÜ ANGAZÜKTSÜBA OJANG

Intet
(v) tashi (tain) akümba (mature)
* Onok ajak yimtak **intet**.

Inti
(n) nisung ajak, yimkong (entire community)
Arogo shia küm nung **inti** mungdang khen alir.




Happy Birthday

TENÜNG : WAPANGTOSHI JAMIR

Tasoba anogo : May 14
Küm : 2 years
Talidak : Diphupar, Dimapur

Jabaso Wapangtoshi Jamir arishi küm ana (2 years) tashi Tsüngrem taochi nung kümzüka anir aruba asoshi asen teyanglur tenüng asanger. Ano maneni jabaso taküm Tsüngrem metetba nung anitsü aser arishi talang moajang ta sarasademtsür.

- Temeim Oja, Oba, Otsü, Obu aser Kinungertem



NAI-A YA METETTER MA?

Okinawa, Japan kübok anguba lisem nung petinu mesük lisemjang dena lir. Item lisemjang ya shitakbabo Marine Protozoa indang Exoskeleton lir. Item Marine Protozoa ya tesüiba küm million 550 tejakdang tzüyim telung nung lia liasü.



SUDOKU # 5854					TELANGZUBA # 5853												
4	9				5	3	8	2	5	7	4	1	3	9	6		
7			8			2	4	6	1	9	5	3	2	7	8		
			5		7		9	7	3	8	2	6	1	5	4		
		2	9		4	6	1	5	3	4	2	6	9	7	8	1	
9	6		8		7		3	5	6	8	9	5	1	7	4	2	3
5	3			2	6			7	7	1	2	3	8	4	9	6	5
3			5				8	4	3	5	8	4	7	2	6	1	9
2		6	4	1			7	9	2	4	6	1	9	8	5	3	7
			7	9		5	2	6	1	9	7	6	3	5	8	4	2

OJANG LUTEP # 5397

BABELAIENO :

ANGAMPYIM :

ATSSHISÜ :

IAG :

SÜMA :

EMALAJU :

GAAJAN :

NGDA :

JIIBA :

KOKAER :

OJANG LUTEP TELANGZÜBA # 5396

TANGATETBA MEKAI TENZÜKBAJI ANÜNG TOM NUNG KI YANGLU DEN KASA

TAN HOPTA ATEMA - KOMA SÜLA ?

Q. Asen lima nung Covid-19 agi shirangertem anepalutsü pur doctor aser nursetem agi meperi aküm nunga koma süla ?

Olong 20 shi nung May 14, 2021 tashi nung iba telangzüba ya onok dangi (e-mail - tiryimim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimim.in) ajanga yokang. Telangzübatemji taruba Honibarnü adoktsüsü.



New Delhi, May 13, 2021: Brihostibarnü Republic of Korea nungi yokba rapid testing kits 10,000 Delhi Airport tonga bener arua aliba noksa nung angur.

Yimsü aser yimtenren sentongtem ajanga India nung Covid prok: WHO

New Delhi, Monupii/May 13 (Agencies): India linük nung coronavirus tashidak ano tali pokteta tanaben sashia prokba ya kuli aika ajanga lir, item rongnung tamangba yimsü dak sendakba sentongtem agiba aser yimtenren party tem sentong balala agiba ajanga lir, ta World Health Organisation (WHO)-i metetdaksü.

"India nung Covid-19 case tali akümba aser iba tashidak agi nisung tali asüba nung B.1.617 densema tanga variants dak sendakba nung tasüngdangbatem akar," ta WHO-i ashi.

WHO-i Covid-19 Weekly Epidemiological Update ajanga

ashiba agi, B.1.617 variant ya India nung tama 2020 küm October ita nung puteta liasü, ta metetdaksü.

"WHO-i tawa India nung iba tensa asadangba mapang nung India nung iba tashidak kanga prokba kuli aika bushiteta liasü, item rongnung SARS-CoV-2 variant balala aika putetba aser tali prokba; tamangba yimsü aser yimtenren sentongtem nung lokti tulu adenshiba aser public health and social measures (PHSM) junga mebenshiba densema lir," ta WHO-i metetdaksü.

India nung SARS-CoV-2 variants jangjatsü atema positive samples shilem 0.1 shi

'sequence' süa GISAID nung upload süogo.

Alima nung Covid tensa dak sendakba nung WHO-i, tan hopta alima nung Covid-19 cases aser nisung asüba tera ajema kümogo; tesüiba hopta nung nisung million 5.5 dak coronavirus putet aser iba tashidak agi nisung 90,000 dak tema asü.

"South-East Asia Region nung iba tashidak putetba shilem 95 aser asüba shilem 93 bo India nung lir, aser alima nunga iba tashidak putetba shilem 50 aser nisung asüba shilem 30 bo India nung lir, ibaji ajanga kidanger linüktem shisabulur," ta kasa osang ajanga metetdaksü.

India nung ano nisung lakh 3.62 dak Covid putet aser 4,120 asü

New Delhi, May 13 (Agencies): India linük nung ano nisung lakh 3.5 dak coronavirus putet aser iba tashidak agi shiranger 4,000 dak tema süogo.

Tesüiba ghonda 24 tsüingda India nung nisung 3,62,727 dak coronavirus putetba sülen tang tashi nungbo India nung coronavirus caseload 2,37,03,665 jungogo, ta Brihostibarnep 8:00 ako nung Union Health Ministry data ajanga metetdaksü.

Tesüiba ghonda 24 nungsa linük nung iba tashidak agi shiranger 4,120 süogo, aser tang tashi nung iba tashidak agi asür ajak agibo 2,58,317 jungogo, ta ministry data nung shia lir.

Tang linük nung coronavirus agi teshirangdakpur 37,10,525 lir, aser ibaji coronavirus caseload nungi shilem 15.65 lir.

Tang tashi nung iba tashidak agi shiranger shilem 83.26 (nisung 1,97,34,823) anepogo aser iba tashidak agi shiranger asüba shilem 1.09 lir.

WHO indang Comparable international data ajanga ashiba agi, tesüiba anogo asem tashi alima nung coronavirus case tasen timtiba aliba linükji India lir.

May 10, 2021 nungi tenzüka alima nung coronavirus tashidak putetba shilem 50 bo India nung lir; iba tetezü tang alima nung linük ajak senteper coronavirus putetba o India kija nung iba tashidak putetbaji

kasa shi dang lir.

Tesüiba anogo asem tashi alima nung coronavirus tashidak agi asürtem shilem asem nungi shilem kabo India nung asüba lir. Tang alima nung anogo shia coronavirus tashidak timba putetba aser iba tashidak agi timba asüba linükji India lir.

Alima nung coronavirus case timba putetba linük ji US lir ajisüaka tesüiba ghonda 24 tsüingda India nung nisung lakh 3.5 dak iba tashidak putet; tesüiba ghonda 24 tsüingda Brazil nung nisung 25,200 dak iba tashidak putet aser US nung nisung 22,261 dak iba tashidak putet.

France nunga nisung 18,000 aser Iran nunga 18,000 tema dak iba tashidak putet.



Belagavi (Karnataka), May 13, 2021: Brihostibarnü Belagavi nung coronavirus wara dak sendakba nung Deputy Chief Minister aser District in charge minister, Govind Karjol nati MP, Mangala Angadi, Deputy commissioner M G Hiremut, Superintendent of Police Laxman Nimbargi aser tanga ketdangsertem den senden amenba noksa nung angur.

Vaccines aser Oxygen den külemi PM Modi-a samaogo: Rahul Gandhi

New Delhi, Monupii/May 13 (Agencies): Ato kilonser, Narendra Modi maneni aija Brihostibarnü Congress lenir, Rahul Gandhi-i, linük nung coronavirus wara mapang nung vaccines, oxygen aser mozütem den külemi Ato kilonser-a samaogo; central vista project aser Ato kilonser indang noksatem ang anünga lir, ta ashi.

Rahul Gandhi-i Hindi oshi nung twitter ajanga, "Coronavirus wara mapang nung vaccines, oxygen aser mozü den külemi Ato kilonser-a samaogo; central vista project aser Ato kilonser indang noksatem ang anünga lir," ta ashi.

Centre sorkari wara anema

jungo meinyaker aser tang linük nung iba wara tanabenbuba prokba mapang oxygen, mozü aser vaccines agi kanga anünger, ta shia Rahul-i mapang shia Ato kilonser, Modi aija arudar.

Congress party nung tongti otongdar, Randeep Surjewalia Ganga ayong nung tasümgang aika anguba onük nung sorkar aitsüogo.

"Tang 'India Tasenba' nungbo ayongtem nung tasümgangtem apongdeka aliba-a sorkari mangur. Taaktsü maket," ta pai Hindi oshi ajanga twitter nung lemsatep.

Paisa Uttar Pradesh kübok Unnao nung tasümgang aika miima aremba osang ka lemsatepa liasü.



May 13, 2021 nü Ahmedabad nung Health worker kati drive-through vaccination centre ka nung vaccine tutsüba noksa nung angur.

West Bengal Angh-i rara adokba tesem semdangbaji tim masü: TMC

Kolkata, May 13 (Agencies): West Bengal nung ruling party- Trinamool Congress-i, state Angh, Jagdeep Dhankhar-i Brihostibarnü Cooch Behar district nung semdangbaji tim masü; state sorkari ashiba mangai pai item tesem semdangogo, aser pai temzüng alema inyakogo, ta aitsü.

Bodhbarnü Chief Minister, Mamata Banerjee-i shidi ka ajanga Dhankhar dang, nai Cooch Behar semdangra ibaji ajanga küm aika tsüingda renemba inyakim alema inyaker asütsü, ta shia pa dang item tesem mesemdangtsü mepishia liasü.

Ajisüaka Angh-i, pai linük temzüng nung aliba teinyaktsü tim inyaker, aser pai Cooch Behar semdangbaji election tembangba sülen rara adokba ajanga takoksa angurtem den tejashi lemsateptsü atema semdang, ta langzü.

Brihostibarnü TMC MP aser party otongdar, Sougata Ray-i, "Pai (Dhankhar) state sorkari ashiba mangai Cooch Behar semdangogo. Pai BJP lenir ka den külemi iba tesem jagi ao. Pai temzüng alema inyakogo," ta aitsü.

BJP MP, Nisith Pramanik-i

Angh Dhankhar meina district kübok rara adokba tesemtem semdanga liasü.

"Tamalen onoki shidi ka ajanga linük Tir dang Angh anema osang metetdaksü. CM-i melungra onoki pa anema ano Tir nem shidi ka agütsütsü," ta Ray-i osangbenertem nem metetdaksü.

Yaküm December ita nung TMC-i shidi ka ajanga Tir, Ram Nath Kovind dang Jagdeep Dhankhar Angh menden nungi agentsüla, kechiyong pai linük temzüng alema mapang shia yimjak nung state sorkar anema jembir, ta metetdakja liasü.

TMC lenir aser Minister, Sobhandeb Chattopadhyay-ia, Dhankhar-i inyakba ya state Angh ka inyakba memesük, ta aitsü.

Chattopadhyay, "Election sülen rara atema state sorkari mera agia inyakdar saka iba onük nung Angh-i politics asayar. State-i wara anema raraba mapang nung pai politics asayar. Covid tensa atema Angh aser state sorkar nati longjemer inyaktsüla," ta ashi.

West Bengal nung assembly election tembangba sülen Cooch Behar nung BJP aser TMC pusemertem tsüingda rara adoka party ana nungjagi nisung 16-17 shi süogo.



Gaza Strip north tsütsü Beit Lahiya jila nung Israel mitkartemi tayimtsü amshia amakdang Palestine nunger ki raksatsür aliba noksa ka yangi angur. Jerusalem nung hopta aika longkak aita azüdokshiba sülen Israel-i Gaza nung tayimtsü amshia amaker.

Afghanistan nung asemnü ceasefire tenzüker

Kabul, Monupii/May 13

(Agencies): Muslim nunger Eid al-Fitr benjong tenzüka mapang Taliban aser Afghan sorkar tsüngta molungtepba asemnü ceasefire tenzükerogo, kong hopta aika kanga sashia khatapa liasü.

Brehostibarnü nungi tenzüka khen atema tezüngzüktep yangluba ya Taliban-i benok aser Tir Ashraf Ghani-ia molunga agizük.

Taoba küm Taliban den züngzüktepba ama May 1 tashinung United States-i par sepa ajunga anir momaba sülen Afghanistan nung azüdokshi tali akum.

Küm 20 jungnüa raraba mapang khen atema rara anena ataba ibai pezübuba ang alitsü, aser Afghanistan nung

nüburtem Eid benjong anisüngzük nung amungtsü imlar, koba Muslim nunger lumiba ita, Ramadan tatem temaitsü amunger.

Azüdokshi agi mapang talanga timema aruba Afghan nungertem anisüngzük tera angur, ta osangbener kati Kabul nungi ashi.

"Ceasefire mechi tanep Kabul nung kinungertem tanur den külemi senzüba ngua temolung anisüngzüker," ta lai ashi. Taliban aser Afghan sorkar tsüngta taoba küm September ita yimjung ken o jemi tenzüker, saka linük balalai anir merangaka terenlok makai anendaka lir.

Taoba mapanga ceasefire ya sangdonga liasü, aser ibai Taliban lenirtemi linük tesem tuluka amokbanga aliba tashi

sayutsü atema inyakba ka dang lir, ta aikati bilemer.

US aser NATO ajanga par sepaitem ya September 11 tashinung anizüker aotsü nangzüka lir. Taliban temi US sepaitem den meraratsü meranger saka Afghan sorkar meyong sepaitem dak amakba tali kumogo.

Tawa province aika nung azüdokshia liasü. Mongulbarnü Taliban teloki Nerkh district agi, koba Afghan yimtiba, Kabul nungi kilometer 40 shi pilar Wardak province nung lir.

Honibarnü Kabul nung school ki ka kima bomb ishika poka kaketshir timba sür nisung aika takum samatsü. Iba lendong ya ketdangsürtemi Taliban dak tai tongtsür, saka parnoki magizüker.

Colombia nung sorkar anema hopta asembuba longkak aiter

Bogota, Monupii/May 13

(Agencies): Tawa azüdokshiba aser tashidak wara agi kongshir aliba linük nung senotsü teyari agüjang ta takhangba agüja Colombia nung union züngsemtem, kaketshir, pensioner aser ano aikati sorkar anema hopta asembuba longkak aiter.

Bodhbarnü Bogota yimti kübok Bolivar Plaza nung nisung meyirijang aika adenshia liasü.

Tang Colombia sorkari agiener aliba saru temelenshi indang sentong ka mechi mapang kabo longkak aiter temi azüdokshia liasü.

Tang longkak aiter temi tang longkak aityonga aruba mapang azüdokshiba atema police khuret südaktsüsüla aser linük indang healthcare system privatise südaktsüsü

aliba agientsüla, ta akhanger.

Colombia nung iba longkak aitba mapang nisung 40 tepsetogo, koba human rights ombudsman ajanga bushisüngdangogo. Yangji aliba aser linük balala nungi rights group temi asümar ya timba alitsü, ta ashir aser azüdokshiba atema police tenüng asener.

"Police temi human rights nung aibelena longkak aiter ajak aser Bogota nung yimjung nung longkaki aiter dak tashiyim amshia liasü. Police temi teti tashiyim amshir," ta longkak aiter kaketshir kati osangbener dang ashi.

Tir Ivan Duque-i jembishinütsü molunga lir ta shiogo saka longkak aiter aikati sorkar tenangzüka nung temelenshi alitsü, ta temolung melemeter.

(Maneni tapak 9 nung...)



Cali, Colombia nung lisopuri sorkar anema longkak aitba mapang tangokba noksa nung angur. Sorkari public services, totzü, taa aser pension nung saru temloksü atema sorkari onük benokba Tir Ivan Duque-i agienjaka Colombia nungeri sorkar anema longkak aitba manener.

Nepal nung sorkar tasen tentettsü tim atemer

Kathmandu, Monupii/May 13

(Agencies): Nepal nung Hombarnü trust vote agitepba nung Ato Kilonser K P Sharma Oli-i takok mongutetba sülen tiri Brehostibarnü tashinung sorkar tasen ka kumtetsü asoshi anogo süzkükja aliba tongaka telok balala tsüngta mangatetep aliba mechi tangatetep kati maruteti lir. COVID-19 tashidak timba kuma health facility aser oxygen agi anünga akumba mapang ka nung linük nung yimtenren tsütsü mangatetep ya ajurur.

Party tir Sher Bahadur Deuba lenisüba kübok Nepali Congress ajanga ato kilonser menden agitsü Mongulbarnü telemtetba agi. Saka Mahanta Thakur-i aniba Janata Samajbadi Party (JSP-N) ajanga sorkar tentetba sentong kecha nunga shilem magitsü ta sangdongba sülen teloktep sorkar ka kumtetsü sentong nung takok mangu. House of Representatives nung Thakur-i aniba telok nungi vote 16 shi lir.

Nepali Congress ket nung vote 61 lir, aser parnok den Communist Party of Nepal

(Maoist Centre) dena lir, aser par ket nung vote 49 lir. Janata Samajbadi Party nung Upendra Yadav-i aniba teloki Congress-Maoist Centre alliance nungiter, aser par kabu nung vote 15 shi lir. Saka parnok ajak senteper vote 125 dang tongteter, aser menden 271 aliba House nung teloktep sorkar ka tentettsü asoshi menden 136 nungdaker.

Tir Bidhya Devi Bhandari-i opposition party tem dang sorkar tasen ka tentettsü asoshi Brehostibar aonung 9:00 ako tashinung ozüng yanglur timba anir arung, ta shia lir. Iba atsütepba tatembang kati arutsü mechi, CPN-UML lenir Bhim Bahadur Rawal, shiba Madhav Kumar Nepal-Jhalanath Khanal faction nungi lir, pai sorkar tasen ka tentettsü mechi lenir ana den jungtepa aser yaritepa alir ozüng yanglurtem dang menden nungi alutsü Mongulbarnü ajungshia liasü.

Rawal-i Bodhbarnü Twitter nung, Oli-i aniba sorkar laokdaksütsü atema Parliament nungi parnok anentsüla, ta zülua

liasü. "Tebilemstü khuret alakteta alidak taneptsü alakteta nungdaker. PM Oli-i linük tejangraba aser party tamendakba anema mera talila agiba nungi nokdangtsü aser democratic yimya masüba meinyakdaksütsü mechi pa anendaksütsüla," ta Rawal-i Twitter nung zülua liasü.

"Iba atema asenok Parliament züngsem ama menden nungi alutsüla. Yimtenren aser tzüzüng-ozüng tsütsü aji tim lir," ta paisa ashi.

Nepali-Khanal faction nungi UML ozüngyanglur 28 ya mapa yutsünungang, Thakur aser Rajendra Mahato den yaritepa arur Janata Samajbadi Party-Nepal ((JSP-N) nungi züngsemtemi menungitaka Nepali Congress aser CPN-Maoist Centre ajanga sorkar tasen ka kumtetsü temelaba akumtsü. Hombarnü Oli atema vote agitepba mapang UML nungi par 28 yagi shilem magi.

UML züngsem 28 ya menden yutsüra House of Representative züngsem 271 aliba nungi 243 dang akumtsü.

Yamaji mesüdaksünüba agi taoba mapang party lenir pezü züngsem nungi khen atema indoka aliba Oli-i agientsü.

Par pezü ya Nepal, Rawal, Surendra Pandey aser Ghanashyam Bhusal alitsü. Saka iba telemtetba ya ajanga taoba ato kilonser den sendaktepa aser jungtepa aliba ozüng yanglurtem ya mapa yutsütsü asü masüar mejangja. Nepal-i CPN-UML lenirtem dang parnoki akhangba ya Brehostibar nikongdang 4:30 ako tashinung perijang, ta mapang latetja lir. CPN-UML mendenpuba, Oli-i Nepal den telephone ajanga mesüzüksü meranga jemi.

Kasa mapang JSP-N lenir Baburam Bhattarai-ibo party ajak senteper teloktep sorkar ka tentettsü nungdaker aser küm ka tsüngta election agitsüla, ta ashi.

Iba ama sorkar ya taoba ato kilonser mesüra tang teinyakdak ato kiloner nem manidaksütsüla, ta Bhattarai-i ashi.

Trust vote agiba nung Oli-i

takok mongutetba sülen NC, CPN-MC aser JSP nung Yadav-i aniba teloki Tir Bhandari dang sorkar tasen ka tentettsü atema lenmang lapokja Constitution indang Article 76 (2) benoktsü ajungshi. Iba arlla nung, House nung nübu timba aliba party tejangja melira Tiri House züngsem ka ato kilonser ama shimtsü aser pai Parliament indang lower house nungi party ana mesüra tali anir sorkar akumtsü, ta shia lir.

Brehostibar nikongdang tashinung ana mesüra tali aliba political party temi majority Prime Minister ka magitsütetra, Tiri Arlla 76 sub-clause 3 nung aliba ama minority Prime Minister tenüng ka meshitsü.

Nepal sorkar tenteta aliba Nepal Communist Party (NCP) tsüngta tashi agi raktepa mapang Ato Kilonser Oli-i ashiba angaa, Tir Bhandari-i April 30 aser May 10 nung election tasen agitsü ta taoba küm December 10 nü sangdongba sülen iba linük nung mangatetep ya adoka liasü.



Dimapur, Monupii/May 13, 2021: COVID-19 wara agi meimchirtem timtema aliba mapang ka nung, Bodhbarnü (12.05.2021) 'International Nurses Day' anogomung nungtem nung HQ IGAR (North) kübok Assam Rifles indang Kohima Battalion-i Kohima nung Meriema Covid Care Centre, Naga Hospital, Oking Hospital aser Bethesda Hospital tem semdanga Nursing Staff nem tenüngsang agütsüogo. Meimchir taküm ka kümzüksü asoshi amang sangwa metitemi nurse temi bendanga agüja inyaker aser parnok mapa jangjashitsü nükjidong nung Assam Rifles-i parnok semdanga liasü. Kasa mapang Assam Rifles-i item mozüki nung inyaker nursing staff nem nanglong lema agütsüogo, ta sangdong ajanga metetdaksü.

Quad Camera aketba Redmi Note 10S sayaogo

New Delhi, Monupii/May 13, 2021 (Agencies): India nung Xiaomi sub-brand Redmi-i parnok indang Note 10 series nung Redmi Note 10S bendenlokba sangdongogo. Iba smartphone ya taküm February ita Redmi Note 10, Redmi Note 10 Pro aser Redmi Note 10 Pro Max den külemi alima tesem balala nung mezüng sayaa liasü.

Iba smartphone tasenba nung MediaTek processor aser tesülen quad camera inokja lir. Redmi Note 10S ya taoba Note 10 ama "evol" design alitsü. Redmi-isa iba smartphone den külemi brand indang mezüng smartwatch ka sayaogo.

Tang, India shishilembadak dak teyokdak aliba Mi Watch (sen 9,999) den iba smartwatch kasa alitsü. Ajisüaka, iba smartwatch tasenba ya Mi Watch dang nungi dalangba aser shishilembadak Realme Watch den tokteptsü.

Redmi Note 10S nung 6.43-inch full-HD+ (1,080x2,400 pixels) AMOLED hole-punch display den MediaTek Helio G95 chipset inoka yanglutsüogo. Iba smartphone yagi dual-SIM cards support asür aser operating system ji Android 11-

based MIUI 12.5 out-of-the-box alitsü. Phone tesülen quad camera setup nung 64-megapixel primary camera, 8-megapixel ultra-wide camera, 2-megapixel macro sensor aser 2-megapixel depth sensor inoka yanglutsüogo. Selfie aser video calling atema Note 10S tejaklen 13-megapixel shooter angutsü.

Tesülen primary camera yagi 30fps nung 4K (Ultra-HD) video tangokteter. Ano külen, tejaklen camera yagi 30fps nung Full-HD video tangokteter. Redmi Note 10S indang camera app nung AI portrait mode deb bokeh aser depth control, macro video mode, pro-time-lapse video, slow-motion aser tanga aika angutsü. Iba phone battery tasazük 5,000mAh alitsü aser 33W fast charging support asür. Security atema, iba phone nung AI Face Unlock den side-mounted fingerprint sensor dena lir.

Tanga feature tsütsü reprangdangra, Redmi Note 10S nung 4G, Bluetooth v5.0, dual-band Wi-Fi, dual speakers aser tzü/auyi nungi kümzüksü atema IP53 rating dena lir. Redmi Note 10S smartphone ya

May 18, 2021 nungi tenzüka Mi.com, Amazon, Mi Home aser Mi Studio store tem ajanga angutsü. Redmi Note 10S - 6GB + 64GB storage variant jenjang sen 14,999 aser 6GB + 128GB storage jenjang sen 15,999 alitsü.

Maneni, Redmi Watch nung 1.4-inch touch display aser navigation atema button ka angutsü. Iba smartwatch ya Ivory, Black, Blue sentsü nung angutsü. Tanga feature tsütsü reprangdangra, iba watch nung heart rate monitor, NFC, Bluetooth v5.0 aser tzü meter 50 tashi waterproofing feature inoktsüogo. Iba device ya Xiaomi Mi Fit ajanga achayangtsür aser battery tasazük 230mAh alitsü, koba khen charge nung anogo 10 tashi amshiteter.

Iba smartwatch nung POGO pin charger ka dena lir aser ghonda ana nung battery shilem 100 tashi charge sütsür. Redmi Watch touzük gram 35 gram alitsü, koba Mi Watch dang gram 5 agi tepungbaba lir. Iba smartwatch jenjang sen 3,999 alitsü aser May 25, 2021 nungi tenzüka Xiaomi channel aser Flipkart sabang ajanga angutsü.

Tuensang DTF senden agiogo

Tuensang, Monupii/May 13, 2021 (TYO): Brehostibarnü, DC Conference Hall Tuensang nung Tuensang District Task Force for COVID 19 senden ka menogo. Iba senden nung DC aser Chairman DTF Tuensang, Kumar Rammikant IAS menden liasü, ta sangdong ka ajanga metetdaksü.

Iba senden nung, DTF züngsemtemi State Sorkar ajanga lateta aliba 'total lockdown' temzüng nung mapang agia olemtepa liasü aser teküboklen agüja aliba tetuyubatem nung item mera agitsü asoshi telok bangjemtep.

1. Kibong ka atema 'One Card system' tenzüksü, kong nungdakba osettsüset/chiyongsü tem lijaliyongsü atema kibong ka nungi züngsem ka dang card bener shishilembatsü.

2. Nübur ajak dang pei pei tata ward nung nungdakba osettsüset/chiyongsü tem lijaliyongsü asoshi tetuyuba agütsür.

3. Dokanten anepdang 6:00 ako

nungi anüngdang 12:00 tashi dang lapoktsü melar.

4. District Tasks Force (DTF) ajanga melaba dak alaka, nija garitem senzüsensongtsü nokdangter.

5. Alu ayimertem aser alu nung inyakertem pei pei mapa/wadangi aotsü asoshi melatsü, saka alui aotsü atema anepdang 6:00 AM nungi 9:00 AM aser alu nungi meyipa adoktsü atema nikongdang 4:00PM nungi 6:00PM tashi melatsü.

Item tetuyuba ajak nung nüburtemi anidaksü aser parnok senzüsensongba mittsü asoshi, police den külemi pei pei tata ward aser sector nung lennirtem khuret asütsü.

Maneni, iba senden nungsa, telephone ajanga Covid-19 agi shirangertem den tongteprateptsü aser shisatsü nung parnok yaritsü atema medical takotet aser arogo nung lennirtem densema counseling team ama tenzüksütsü telok bangjemtepogo, ta kasa sangdong nung shia lir.

'About My Father' nung Robert De Niro denogo

Los Angeles, Monupii/May 13, 2021 (Agencies): Taruba comedy film 'About My Father' nung Robert De Niro-i tongti shilem agitsü.

Lionsgate indang movie tasenba nung Sebastian Maniscalco den arishi küm 77 tain Robert cast rongnung anisemogo. Iba film ya Sebastian indang character taküm aser tebu (Robert) tena tesendaktep otsü ka alitsü.

Sebastian aser Austen Earl nati züluba screenplay nung ajemdaker Laura Terruso-i iba film direct asütsü.

De Niro aser stand-up comedian Sebastian na Netflix movie 'The Irishman' nunga külemi inyakogo.

Depth of Field indang Chris aser Paul Weitz nati Andrew Miano den longjemer iba Project yanglutsü. Kasa mapang Judi Marmel-i executive producer ama inyaktsü.

Lionsgate Motion Picture Group indang president, Nathan Kahane-i, "Sebastian-i tebu

Salvo indang jembiba yimya asadangshia liasü aser iba role atema Robert De Niro ya actor tetemsü ka alitsü ta onoki bilemer. Ibayongji, iba Project nung pa anioksü lemtet," ta ashi.

"Robert De Niro-i kanga dang kümdanga project tem shimer ang shilem agir. Pai iba screenplay ngua shilem agitsü mulungtetba atema onok pelaseter. Iba film atema Sebastian aser Robert naprongla actor tetemjen lir aser taküm tena den iba project maparen tenzüksü asoshi yongyaseter" ta pai ashi.

"Laura indang maparen onoki kanga dang sapua aruogo. Sebastian ama, lar tsürabura Italy nungi arurtem lir aser lai otsü tajung ka renemtsüogo," ta Paul Weitz-i shisem.

Iba film dak alaka, De Niro-i Martin Scorsese indang project 'Killers of the Flower Moon' aser 'Armageddon Time' densema film balala nung teinyakdak lir.

Colombia nung sorkar... (Tapak 8 nungi..)

Kasa mapang national police force ajanga disciplinary investigation ter dak tema tenzükgogo aser nisung tepsetba ken o nung police asem anema ken o benoka lir.

Saka iba linük nung longkak aitba aser lenmangtem mokdangba ya anogoshi ajurur. Cali yimti anüolen Bodhbarnep nisung 200 shi yangji aliba university ka nung adenshia liasü.

"Cali mesüra Colombia

nung mapa mali. Asenok ola madoki talangka lia aruogo," ta arishi küm 50 tain kisü-jensür kati osangbener dang ashi.

Latin America linük aika nung COVID-19 tashidak wara agi kanga mejungi kongshir lir. April ita Colombia nung mapa mangur ya shilem 17 jungnüa akum.

Saka longkak aiterem iba dak nungi alaka oa jashi, ta Washington Office on Latin America nung Andes director Gimena Sanchez-i ashi.



Bogota, Monupii/May 13, 2021: Bogota, Colombia nung nübur timtemba, police-i tashiyim amshiba aser healthcare den education system tsütsü bendanga amshiba nung Sorkari mapa inyaktsü asoshi takhangba agüja lungkak aitba mapang, musician telok kati asemtem tema jajaba yangi noksa nung angur.

Italian Open: Djokovic quarter-final-i iogo


Rome, Monupii/May 13, 2021 (Agencies):

Brehostibarnü, Italian Open asayamung tebur kija Round of 16 asaya nung World no.1 Novak Djokovic Spain nunger Alejandro Davidovich Fokina madak set ana nung atonga takok ngua quarter-final tongtetogo.

Foro Italico nung terepranger matsündang asayar ana toktepa liasü aser Djokovic-i iba asaya ayong ayonga koktet.

Pungoben tashi Rome asayamung (Italian Open) takok angusang Djokovic-i 6-2, 6-1 agi Alejandro tsükdaktsü. Djokovic aser rank 48buba Alejandro na tsünda ghonda 1 ser minute 10 asaya, kong terepranger shilem 25 tashi melaa liasü.

"Iba asaya tajung liasü aser terepranger matsündang asayatsü jangratemsüka lir. Mapang talangka parnok menungra aruogo. Parnok



tanaben angudang kanga pelar," ta arishi küm 33 tain Djokovic-i ashi.

Asayar ana tsünda Round of 16 asaya tenzüker Djokovic-i pa indang mezüing service game makokba sülen, pai serve pungo tashi atonga takok anguba ajanga Alejandro amokbanger asayatsü maongka angu. Iba set nung Alejandro-ia kanga meranga toktepa asaya liasü, saka Djokovic menepa asayatsü menuadok aser Djokovic-i match point trokbuba nung iba asaya koktet.

"Pai (Alejandro) junga asaya

tenzüker, saka ni break point angutsü asoshi merang aser asaya yimyatem azüoka kümdanga asaya. Hombarnü asaya den medemdangra, tanü ni shilem 20-30 agi tajungba asaya ama bilemer," ta Djokovic-i ashi.


Grand Slam 18ben tashi takok angusang Djokovic-i semifinal tongtettsü atema pai Greek nunger seed pungobuba Stefanos Tsitsipas den quater final asayatsü.

Kasa asayamung tebur kija Round of 16 asaya tanga ka nung Stefanos-i Italy nunger seed tukububa Matteo Berrettini madak 7-6(3), 6-2 agi kokogo.

America nunger Reilly Opelka-i 7-6 (6), 6-4 agi Australian Open semifinalist Karatsev tsükdakja quater final tongtogo.

Tebur kija quarter final tanabuba nung Reilly-i Argentina nunger Federico Delbonis den asayatsü terenemba lir.

WBBL nung Shafali aser Radha asayatsü



Radha Yadav

Shafali Verma

New Delhi, Monupii/May 13, 2021 (Agencies): India tetsür Cricket team nung batting tsütsü asayar takotet Shafali Verma-i taküm küm tatemen Women's Big Bash League nung shilem agitsü. Iba asayamung anaben tashi takok angur telok - 'Sydney Sixers' den Shafali longjemer asayatsü terenemba lir.

Arishi küm 17 tain Shafali den külem asayar - 'left-arm spinner' Radha Yadav adentsü imlar. Radha anioktsü atema Sydney Sixers franchise den jembishinüdar.

"Shafali den tenanzüktep maparen tembangogo, Women's Big Bash schedule sayaba mapang iba osang sangoktsütsü," ta BCCI sangdong ka ajanga metetdaksü.

"Radha-a iba league nung adentsüsa Sydney Sixers den jembishinüdar," ta kasa sangdong nung shia lir.

Shafali ya tainlonglong tetsür ka asünung, iba League nung shilem agitsü asoshi la tebu temelaba nungdaker.

Australia indang cricket League tulutiba nung Shafali-i T20 skipper Harmanpreet Kaur

(Sydney Thunder), opener Smriti Mandhana (Brisbane Heat) aser all-rounder Veda Krishnamurthy (Hobart Hurricanes) nunger den adentsü. Par asem yagi WBBL nung asayadanga lir.

ICC women's T20I ranking nung World no. 1 batter Shafali-isa taküm küm England and Wales Cricket Board (ECB) indang The Hundred - domestic asayamung lapokba nung Birmingham Phoenix tenüing nungi asayatsü sentong lir.

ECB indang 'The Hundred', koba alima ajunga asüingba COVID-19 wara ajanga taoba küm anogo atsülangja liasü, iba asayamung taküm July 21 nungi tenzüka asayatsü terenemba lir. Iba sülen ang WBBL asayatsü.

Shafali atema 'The Hundred' ya bendanglen asayaba T20 asayamung mezüing alitsü. International Cricket wadang tsütsü la ya batting asayar tajung ka kümogo. One Day International asaya 21 nung lai strike rate 148.31 nung run 617 tashi yanglua lir.

ICC Test Team ranking nung India-i temaba jenjang tongtet

Dubai, Monupii/May 13, 2021 (Agencies): ICC team ranking indang Test asaya tsütsü team balala asadangshia arur sülen, India temaba jenjang tongtetogo, ta Brehostibarnü ICC sangdong ka ajanga metetdaksü.

Test asaya 24 nungi India-i point 2914 ajanzüksetta aser rating -121 ngua temaba jenjang tongteteter alitsü.

Iba ICC Tests ranking nung Virat Kohli'er telok sülen parnok den taküm World Test

Championship final asayatsü pur - New Zealand team-i rating 120 tongteta tanabuba jenjang nung lir. New Zealand-i Test asaya 18 nungi point 2166 ngua lir.

England (109 rating) team pur tasembuba aser parnok sülen Australia (108 rating) pezübuba nung alitsü. Ano külen, pungobuba nung Pakistan (94) aser West Indies (84)-i jenjang ana tashi ajangtetba ICC Test Ranking nung parnoki trokbuba

tongtogo.

Kasa ICC Test Ranking nung South Africa (80) aser Sri Lanka (78) na jenjang tenetbuba aser tibubai luogo. Team ana sülen, table punglanglen Bangladesh (46) aser Zimbabwe (35) lir.

Maneni, June 18 nungi 22, 2021 tashi Southampton indang Ageas Bowl nung India aser New Zealand tsünda mezüing World Test Championship final asayatsü terenemba lir.

SL ODI captain asütsü Kusal Perera shimogo



Kusal Perera

Monupii/May 13, 2021 (Agencies): Iba ita Bangladesh nung oa asayatsü aliba asayamung atema Wicketkeeper-batsman Kusal Perera, Sri Lanka ODI team captain asütsü shimogo aser Kusal Mendis vice captain asütsü shimogo.

Karunaratne den asayar tejen Angelo Mathews, top-order batsman Lahiru Thirimanne aser wicketkeeper Dinesh Chandimal nunger ajaka Sri Lanka Cricket Cricket Selection Committee-i iba asayamung atema meshim.

Item asayartem melena team nung asayar tejen aika shimogo.

Pacer Chamika Karunaratne aser batsman Shiran Fernando na tang mezüingbuba ODI nung

asayatsü atema shimogo aser kasa mapang nung Binura Fernando shiba T20I ka ana nung asayaogo, paa team nung züingoksemogo.

SL team Bangladesh-i May 16 nü aotsü. Parnok Bangladesh den Dhaka nung May 23, 25 aser 28 nü ODI asem asayatsü renema lir.

Squad:

Kusal Perera (capt), Kusal Mendis (vice-capt), Danushka Gunathilaka, Dhananjaya de Silva, Pathum Nissanka, Dasun Shanaka, Ashen Bandara, Wanindu Hasaranga, Isuru Udana, Akila Dananjaya, Niroshan Dickwella, Dushmantha Chameera, Ramesh Mendis, Asitha Fernando, Lakshan Sandakan, Chamika Karunaratne, Binura Fernando, Shiran Fernando.

Belgrade nung Boxing world championship asayatsü: AIBA



New Delhi, Monupii/May 13, 2021 (Agencies): Tebur atema Serbia indang Tir, Aleksandar Vucic-i maparen championship ya Belgrade, Serbia nung October 26 nungi November 6, 2021 tashi asayatsü, ta Mongolbarnü International Boxing Association (AIBA) sangdong ka ajanga metetdaksü.

Iba asayamung ya India nung asayatsü renemer liasü, saka iba Championship ayongtsü atema taoba küm taa (fee) magütsütetba sülen India-i asayamung ayongtsü rights' mangu. Iba sülen, Serbia nung asayamung asayatsü AIBA-i lemte.

"Iba asayamung ya October 26 nungi November 6, 2021 tashi asayatsü," ta AIBA-i metetdaksü.

Boxing world championship atema Serbia indang Tir, Aleksandar Vucic-i maparen achaayangtsü. Aleksandar ya Local Organising Committee (LOC) nung tekolak ka lir.

"Alima tesem balala nung boxer tem parnok sempet tajungtiba sayutsü atema AIBA - tebur World Boxing Championships ajanga parnok nem sabang ka agütsütsü terenemba lir," ta AIBA President Umar Kremlev-i ashi.

"COVID-19 dak sendakba tekümdangtsü meratem agia, iba asayamung takok ngua asayatetsü onoki tajungtiba nung achaayangtsü," ta pai shisem.

Taoba World Boxing Championships ya 2019 küm Ekaterinburg, Russia nung ayonga asayaogo.

BILEMDANGANG

"Lenmang shitak nung mera tilaka agibaji nü taküm asoshi mera tulutiba asütsü akok."